

STRONG BILONG OL MERI LIDA LO HAUSLAIN/PLES: OL STORI IKAM LONG OL LIDA BILONG LUMUSA INSAIT LONG PNG MERI FAMA BISNIS PROJEK

Stori bilong Jennifer



Jennifer igo inap/mak long Gr 6 na ino go moa, bilong wanem, ino gat high (hai) skul long ples bilong em. Em kamap wanpela Sande Skul tisa long yangpela taim stret – papa bilong em i wanpela sios pasta na mama bilong em i wanpela sios lida. Jennifer i bin igat laik long kamap olsem mama bilong em tasol long dispela taim i nogat dispela pasin (o sans) bilong sanap/wok igo pas long ol arapela meri. Olsem nau na Jennifer igo merit na igat/karim 4pela pikinini.

Laif bilong Jennifer i senis long year 1980 taim Sista Kay, wanpela meri bilong helpim ol meri karim/kisim bebi long ples i singautim em long kisim skul long mekim wok olsem em iet – olsem meri bilong helpim ol meri karim/kisim bebi long ples, long tok Inglis ol i kolin Village Birth Attendant (VBA). Dispela i makim stat bilong nupela wokabaut bilong em olsem wanpela lida.

Long pastaim stret, Jennifer i wok long karim/kisim ol bebi long haus bilong em iet wantaim/yusim dispela nupela save bilong em we i seivim laif. Bihain Sista Kay i givim kapa long helpim lo sanapim wanpela liklik haus-karim; dispela i kirapim wanpela ples insait lo hauslain we Jennifer na ol arapela i ken helpim ol mama long karim/kisim bebi bilong ol. Jennifer i tok: ‘mi save yusim tos long karim/kisim bebi long nait taim. I nogat wanpela bebi i bin dai taim mi statim dispela wok. Mi karim/kisim olsem 103 bebi insait long dispela haus’.

Olgeta lain i rispektim Jennifer, bilong wanem, em i sapotim/helpim olgeta bel-mama. Em i wok nating, nogat pei; ol i singutim em long helpim long wanem taim ol i laik karim/kisim bebi, em ino wari/tingim. ‘Long dei o long nait taim, mi ino wari/tingim; mi stap bilong helpim/sapotim ol bel-mama na ol nupela bebi bilong ol. Mi no save toktok planti long dispela, na mi amamas tasol long helpim ol mama. Sampela bilong ol dispela ol mama i save kam bek na tok tenkyu long mi na givim mi kaikai, ol arapela ino save kam bek tasol mi ino wari/tingim dispela, bilong wanem, dispela em i wok bilong mi na mi amamas tasol lo helpim ol’.

Jennifer i tingting na i skelim igo nau na em i luksave olsem em igat 3pela bikpela wok insait long hauslain – wanpela i olsem VBA, narapela i olsem hetmeri/lida insait long lotu-bung bilong ol meri, na nau long helpim ol meri long strongim moa iet wok/pasin poroman insait long femili na fam bilong ol. Em i tok olsem dispela skul bilong lidasip bilong ACIAR projek i helpim em long luksave long dispela ol wok na em tu i lukim olsem senis i kamap long em iet na long hauslain bilong em tu. ‘Dispela skul i helpim mi long luksave olsem mi wanpela lida name long ol fama. Mi save givim tingting long ol meri long hau mipela iken wok bung wantaim na mi tu lukim olsem planti senis i wok long kamap insait long hauslain’. Em i tok tu olsem dispela save bilong em olsem lida i kamap strong we bipo em ino bin klia long wok na pasin bilong ol gutpela lida; tasol nau em i pilim olsem em igat moa strong wantaim ol nupela save na pasin bilong lida.

Jennifer igat laik long lainim planti samting moa long hau long lukautim mani and skelim mani we em i laik bai i surikim igo long ol arapela meri wantok. Long taim bihain, em i laik wokim wanpela haus kapa na mas igat wara-tenk long helpim femili bilong em lo mas oltaim igat wara bilong drin na kukim kaikai. Wankain olsem ol arapela mama lo dispela ples bilong em, em igat laik tu long strongim na kamapim moa gutpela sindaun insait long femili bilong em, na long ol pikinini imas kisim gutpela skul. Jennifer i amamas long sapot bilong man bilong em na femili bilong em we ol tu i amamas long wok bilong Jennifer. Dispela em i lidasip stori bilong Jennifer.

Jennifer em i wanpela bilong ol planti Hauslain Tisa (VCE) insait long PNG husait istap insait long dispela projek we ACIAR i givim moni na sapotim. Mipela i serim stori bilong em wantaim tok orait bilong em. Go long <http://pngwomen.estem-uc.edu.au/> long painim aut moa long dispela projek.